

Primma de continuâ o discorso pensemmo un po' a quello che l'è successo a Zena inte l'urtima guaera. O neuve de frevâ do 1941 'na flotta inglese a bombarda a çittae senza nisciunn-a reasion, nè marittima, nè aerea (*navi e poltrone?*) Pe fortun-n-a un miacoo o se vedde in cattedrale a San Loenso: un proiettile da 381 o no l'è esploso e o l'è a-a drita vixin a-o monumento a-o Cardinale Boetto. N'atro invece o l'è sc-ciuppòu inte l'Archivio de Stato.

I danni e a brutta figâa son staeti grammi. Ma pe un po' de tempo emmo quetòu; scinn-a a-o meise de ottobre do 1942. Doppo l'alarme se descadenn-a l'inferno, fortezze volanti lancian bombe e spezzoin incendiari in scia çittae. Finìo l'alarme, saian staete e unz'oe de neutte, visto che a nostra casa a no l'èa staeta colpia a mae papà e a mae mamà ghe vegne coae de andà a-a Madonna do Monte pe vedde i danni. Ho capio alloa Neron che o vedde bruxâ Romma.

I danni l'aveivan faei i spezzoin. Éan cilindri de circa un metro de lunghessa, a testa de ciongio pe rompî i teiti d'abbaen, poi 'na miscla de fosforo con un forminante pe dâ feugo e a coa de lamea sottî pe-a diression. Un strumento semplice e micidiale.

Tanta gente a non s'èa accorta subito do pericolo e a l'aveiva lasciòu bruxâ i urtimi ciaen de case.

Questa a l'è un'ipotesi: case vegie e faete in economia no mancan. Però pensemmo ai grandi zeneixi, a Emanuele Brignole, o promotò de l'Albergo di povèi, a-i marmì, a-e statue, a-a richessa di scalandroin, dove o l'evisciòu e dove o l'è morto vestio co-a stessa divisa di atri povèi e dove o l'è assotterròu.

Pensemmo a l'Uspià da Duchessa de Gallea, a-e case popolari de corso Galliera e a-e tante costrussioin faete dai zeneixi che se rendeivan conto – da parte armeno di ciù intelligenti – che dâ recatto a unna casa popolare o costava de ciù de riparà e case di ricchi.

Poco tempo fa in scio Secolo XIX l'è sciortio 'n'articolo che o sostegniva a necessitae de sfołtî i caroggi, senza ricorrî *al picone demolitore di fascistica memoria*. Se tratta ciù semplicemente de rende vivibile o centro da çittae, storico o non storico.

De no ése sc-ciavo de l'automobile ma che e macchine seggian e nostre sc-ciave.

Pe risolve o problema de case vegie bastieiva 'na commiscion formâ da inzeugnè, architetti, geometri e un bon capomeistro, in funsion de assistente contraio (unna specie de rompiballe in senso bon).

A commiscion a dovieiv stabilî e case da aggiustâ e quelle da cacciâ zu. Comme un tempo davan un premio a chi costruiva de navi neue, cossì oa se porrieiva lasciâ un termine de esension senza tasce, a segunda di travaggi. Ovviamente a l'è 'n'idea da perfessionâ.

Azzunzemmo che l'idea ha l'a bezeugno de planche e, sorviatutto, de unna decision politica de largo respio¹.

Ma vegnimmo a l'atro verso da medaggia, çercando de capî comme a l'èa Zena medioevale.



In fondo a-o caroggio da Casann-a ghe son de grandi arcate de incredibile bellezza. Via Luccoli a l'èa quaexi tutta a portici: 'na colonna a se peu vedde inte 'na buttega vixinn-a a ciassa Luccoli. San Mattè a l'è quaexi tutta tampoà. Ciassa Pinelli, Banchi, San Loenso, San Pancrazio, Fossaelo, Santa Cattaenn-a son pin de cose belle senza scordâ atre zone da çittae antiga.

Existe oa un strumento pe rivedde 'na bonn-a parte de Zena medioevale, senza cacciâ zu ninte. *O COMPUTER* deuvioù da-a Facoltà de Architettura: porrieiva sciortine 'na tesi collettiva come ai tempi do Sciusciantotto.

A l'è un'utopia o a peu ese 'na realtae?

A l'è 'na domanda che un vegio zeneise o lascia a-i zoveni di nostri tempi. Grassie pe l'attention.

¹ E cose de badda son quelle che costan de ciù.

ILLUSTRAZIONI

a p. 9: particolare della loggia De Caminna in vico Indoratori
(*Il Centro Storico di Genova*, E. Mazzino-T. Ossian De Negri, Cassa di Risparmio di Genova e Imperia - Stringa Editore, Genova, 1968).

a p. 10: Cattedrale di San Lorenzo
proiettile da 381 inesploso durante il bombardamento navale di Genova del 9 febbraio 1941.